

Special:

PARA FIRME PA SIRBI

Skirbi pa Roland W. Peterson

Pa hopi aña mi ta para firme.

Den solo cayente, awacero, y biento duro.

Nada por a pone mi move, tampoco tembla.

Guera a bin guera a bay, ami a keda para firme.

Pa hopi aña caba mi ta wak over di e pueblo cu mi a sirbi.

Henter e comunidad tabata tin mester di mi.

Mi tabata orguyoso, mi tabata worde reconoci.

Contra e cielo blou mi tabata luci mahestuoso.

Tur hende cu tabata yega na e pueblo tabata reconoce mi, for di leu.

Nan tabata sinta riba mi cura y asina mi por a scucha e redunan.

Pero un dia nan no tabata tin mester di mi mas.

Pa un florin mi a worde bendi.

Nan a priminti mi cu nan lo cuida mi bon.

Awe nan a pone un heki rond di mi pasobra mi a bira peligroso.

Ai...mi curazon ta yora, pero mi no ta laga ni un hende ripara.

Contra biento y marea... mi ta para firme.

Mi por laga un scale cay, pero mi lo no tembla.

Mi a cuminza realiza, cu ora bo bira bieu, y nan no mester di bo

mas, nan ta lubida bo.

Mi tin un ruman na Playa, nunca mi a mira e.

Un cos sigur mi sa, e tambe ta orguyoso y e tambe ta para firme.

Nan a pone un potret di mi den un calender...pero nan a laga e

heki y borchinan cu ta musta cu mi ta peligroso.

Cu tur e potretnan cu nan a yega saca di mi, ta net esaki nan tin di usa.

Ta kico mi a haci mi pueblo, pa kico boso ta castiga mi?

Mi a kere cu mi a sirbi boso ton.

Ai...bo no ta ripara, pero mi curazon ta yora...pero tog mi ta para firme.

Mi ta spera cu mi doño bieu, cu mi a siribi y cu semper a trata mi bon...

mi ta roga e...yuda mi... no lubida mi.

Semper, ami Watertoren di San Nicolas, lo keda e simbolo di determinacion para firme...cu un cabez riba tur, cla pa sirbi...den solo cayente, awacero y biento duro.